

PUISI AFFRUNTUSI PI LI SIGNURINI

PICCIOTTU E PICCIUTTEDDA
(Munnu vanu)

Parlu tanticchia di stu munnu vanu
pi fimminotti di malu caminu,
ci dicinu a lu patri tabbaranu,
passa cchiù picca di lu scuparinu.
Ci dici: figghia, nun ghiri luntanu,
nun t'interessa fare u mutulinu
e quannu torni a casa cu Gaspanu
c'è scantu di duluri ntò pancinu.

Tu picciottu spardi petti e tacchi
pi ghiri ncerca di cosi cchiù licchi,
nta lu purtuni lu pursanti ammacchi
a la picciotta lu cori fà ticchi;
però sta' attenta, figghia, chi t'intacchi
nun ci nni dari retta chi l'addicchi,
e cu si curca cu li cani bracchi
agghiorna la matina cu li zicchi.

LI MEI NUNNI MI CUNTARU

Mè nunnu cu me nunna mi cuntaru
chi mali donni nna vota ci foru,
però camora stravugghi lu scaru
dànnusi locu dunnì c'è ristoru.
Si dicu tutti, sugnu minzognaru
c'è cu teni forti lu tesoru
però c'addiri, li tempi canciaru:
ci va la vacca ncerca di lu toru.

LA FIGGHIA CUNZIGGHIA LA MATRI

Matri ti vulissi cunzigghiari
quannu siti maritu e mugheri,
fallu di vinu bonu sazziari
cu sà chi ci vinissi... ddu pinzeri;
si viri chi nun voli iniziari
dunaccilli n'autri du' biccheri
e viri chi zichittuna porta a fari
chi zappa cu la testa e cu li peri...

NTOVINELLU

Caru pueta rispunni untantiddu,
dimmi cu è chi caca di lu coddu
ntesta scarsu cioffu di capiddu
usannu lu rusceddu cu lu boddu.
È di curpuratura tunnuliddu,
tuccannulu si trova duru e moddu,
nunn'avi manu né peri né ali
e arrancica st'armalu senza scali.

risposta

Cu è chi va di corpu di lu coddu,
è la lumaca chiamata scazziddu
la scuma lu rusceddu cu lu boddu
li corna quattru fila di capiddu,
lu puntu chi si tocca duru e moddu
si trova tra la scorcìa e lu mussiddu,
arrampa senza scala, rocchi e scoddu
chista è certu la natura d'iddu.

LA VICCHIAIA

Nta la vicchiaia a vista n'accurza
e nta la ntisa nni veni la mazza
si va parrannu cu la lingua muzza
allentanu li ammi e poi li vrazza.
A pipiari la siringa appuzza
carennu nta li scarpi l'acqua pazza,
Ma nun dicemu puru dda cusuzza:
nun si rimina mancu si l'ammazza.

MI DISSI DI NO MA IU LA VOGGHIU

Bedda ca tantu tempu ti taliu
t'aiu ntò mé cori cu rispettu
nun diri ancora nò, ciatuzzu miu
pulitu sugnu e senza arcun difettu,
si dici ca mi voi m'arricriu
sanannu sta firita nta stu pettu.
Ma iu speru, si cc'è veru Diu,
di essiri mia cu tantu affettu.

LU CALANNARUNI

Chi canta beddu lu calannaruni,
ti fa l'usignolo e lu cardiddu
sapi cantari li beddi canzuni
chi tutti li noti ti li sapi iddu.
Uncia la argia e puru lu muccuni
cu ddu miludiusu frisculiddu...
ma tu canti comu canta lu apuni
voi canciari versu e ssempri chiddu.

LA CUCUZZAZZA

S' à cucinari tu nna cucuzzazza
fatta cunzata cu la cipudduzza
o puru cotta cu nna vugghiutazza
e po' l'ammogghiu si cci catapuzza
a modu chi sapuri lu sbarazza,
lu stessu fritta nta la paridduzza.
Ma c' accunzari s' è chissa la razza?
Conzala comu vò resta cucuzza.

LU CIUMI SI PURTAU LU SCECCU E LI CARRUBBI

Sintiti picciotti, stamatina
ivi a carrubbi cu lu scicareddu
e mi lu caricavi a barda china
po' lu puncia cu lu puntareddu.
Mentri lu ciumi calava la china
mi scumpari di fermu dd'armaleddu.
Viriti chi disastru chi distrubbi
ciappizzavi lu sceccu e li carrubbi.

Iò puru, mmezzu l'acqua e nta pitruna,
e aggragnatu comu un puddicinu,
ivi a rrinazzari pi fortuna
a un puntu dunnì vosi lu distinu.
Ma ddu sceccu facennu rimazzuna
nun si tinni a nuddu piricinu,
mentri pi mia fa binigna sorti
mi la scanzavi la sicura morti.

LU CANI CHI NUN CANUSCI PATRUNI

Lu cani c'un canusci lu patruni
lu dicu beddu chiaru, campa pocu,
la stessa cosa lu attu manciuni
succeri chi finisci puru ddocu.
La stessa sorti lu malu latruni
nun penza chi ghioca cu lu focu;
spissu spaventi, risagghi, cunfusu:
amara vita e spassu addulurusu.

LU PUISIARI SENZA RIMA

La puisia è cantu di riddu,
sunn'avi cunzunanti pari nuddu
manca l'armunia e lu puntiddu,
pari nna rosa senza pircuddu;
ma cu ddu sonu nfeci d'untantiddu
pari nna firma e supra lu sò puddu.
La rima duna musica e armunia
ripetu pi c'un penza com'ammia.

LA MORTI MUDERNA
(La morti e lu pueta)

PUETA — Tu fai notti e ghiornu la ricota
morti muderna sempri scillirata,
longa è la lista e si nni fa la nota
pi tutta la genti chi veni ammazzata.

MORTI — Ti dicu statti zittu pi nna vota!,
chi tu un viri l'era ch'è canciata,
a la riversa firria la rota
ora si mori cu nna scupittata.

PUETA — Morti c'addivintasti malantrina
li cosi tu li penzi a la crapara,
teni nna menti sturiosa e fina
penzi a cartucci e lampi di lupara,
nni morinu tinti e boni ogni matina
comu si fussi ad annu la tunnara.